

CIN-ove baze među pet najboljih svjetskih projekata

Digitalne baze podataka Centra za istraživačko novinarstvo proglašene su jednim od pet najboljih digitalnih projekata [u kategoriji online medija i novinarstva](#) od strane organizacije World Summit Awards (WSA).

Nagrada pod pokroviteljstvom Ujedinjenih naroda (UN) dodjeljuje se u osam kategorija a stručni žiriji nakon analiziranja 386 projekata izabiru po pet najboljih u svakoj kategoriji.

Projekti su se birali na principu nominacija na državnom nivou, nakon čega su slijedila dva kruga žiriranja. Prvo je online žiri, sastavljen od međunarodnih stručnjaka, uradio predselekciju u osam kategorija, a potom je Veliki žiri birao do pet najboljih projekata po kategoriji.

Kao „svjetski šampion“ proglašena je, u finalnom krugu, tokom globalne konferencije u Singapuru, bugarska platforma za prepoznavanje i upravljanje fotografijama – [Imagga](#).

CIN-ove baze podataka o [imovini političara](#), [javnim nabavkama](#) i [energopotencijalu](#) Bosne i Hercegovine prepoznate su kao kvalitetan sadržaj među skoro 400 predloženih projekata iz 86 zemalja svijeta.

Baze podataka rezultat su profesionalnog i istrajnog rada novinara, urednika i programera CIN-a, čiji je cilj građanima BiH besplatno ponuditi tačne i provjerene podatke o važnim temama.

Nagrada World Summit Award ustanovljena je nakon UN-ovog Svjetskog samita za informatičko društvo (WSIS) održanog 2003. godine u Ženevi. Nagrada se dodjeljuje u suradnji sa UN-ovim organizacijama za obrazovanje, nauku i kulturu (UNESCO) te

industrijski razvoj (UNIDO).